



文

文

文

柯齋選稿

雲間周綸鷹垂氏著



小令

轉應曲

春景

海燕。海燕。羅幌翠簾深見。往來依舊東風低拂桃花
碎紅。紅碎。紅碎。贏得一春無寐。

浪淘沙

春閨

又是送春還別緒。闌珊樓頭儘好。望歸鞍。目斷歸鞍。
無奈也。日下西山。醉夢霎時間。一意千般薄寒。拋

却畫眉灣。閒共楊花都做恨。飛去漫漫。

又 閒情

柳外繫輕船沈醉。涼宵金風。玉露不曾饒。斷送秋光。冬又也。往事迢迢。好夢恰相邀。特地覓消醒時無。奈雨聲驕。挨得雨聲須索睡。滴碎愁苗。

菩薩蠻 閏夕

鴛鴦飛向南塘暮。繡衾描寫些兒住。却下水晶簾。輕拂寶奩。月來花影亂。又過芳春半。畢竟欲黃昏。黃昏隨夢覓。

又 紀夢

鄉心只說江南好。夢歸却在江南道。兩槳拂清波。春山一帶過。畫橋西畔住。覓遍難相遇。待得淚沾衣。山窗聞曙鷄。

又 春閨

算來只是春風惡。吹人一霎離愁作。春在阿誰家。無心理鬢鴉。春風花際度。花發愁非故。春去帶愁歸。明年不用伊。

又 代柬

春寒無那羅衣薄。誰家逗過秋千索。小小最天斜。鬪粧渾似花。相逢初日暮。別是藍橋路。愁也不關伊。頓教憶舊時。

畫堂春

秋閨

繡幃翠被篆煙幽。依前無恙高樓。瑤房深處月華流。閒照人愁。一片畫簾不下。幾回寶瑟難收。憶伊只自少年遊。又在心頭。

又

春懷

碧紗窗外柳絲長。杜鵑聲訴斜陽。落花狼籍燕泥香。

愁掩蘭房。午睡覺來如醉。夢魂猶遶高唐。一枝芍藥映殘粧。鸞鏡淒涼。

憶秦娥

春感

空悲切。尋思往事肝腸絕。肝腸絕。百千愁緒。一番離別。花花交映春時節。枝枝杜宇啼殘月。啼殘月。珠簾不下。向誰高結。

醉公子

送春

脉脉春來去。一陣廉纖雨。脂粉浣儂顏。憶歡長是閒。着意空庭立。有處落花急。別緒不須稠。春風白到

頭。

點絳脣 偶憶

綺閣誰家。疎簾深映春風面。暫時相見。獨立多情戀。
心事無端。掩淚欹鸞扇。思量徧。寂寥庭院。只自愁
千萬。

踏莎行 春望

紅浸江雲。綠浮堤樹。一天春色無重數。惱人欸乃木
蘭舟。為誰載得愁歸去。留恨東風。關情飄絮。來時
只在青青路。樓高無奈捲珠簾。輕帆自帶斜陽住。

又 春閨

春到誰行。愁來甚處。一番悵望無憑據。惱人最遠是
青山。青山不去歡長去。舊日風情。而今意緒。藤蕪
有恨難深訴。欲將錦字倩伊知。夢中銀鹿曾傳與。

楊柳枝 本意

近拂窗紗伴舞人。碧煙如縷畫無痕。飄颺欲散愁千
結。依舊東風過一春。

又

江畔人家向水開。斜暉一片客帆來。無端裊娜牽情

緒如此風光不可回。

阮郎歸

憶別

鉤簾春色望中間。有誰同倚欄。當年只解唱陽關。無時憑信還。長亭路。晚山攢。悲涼意漸闌。萋萋芳草夕陽殘。天涯不耐看。

天仙子

客感

悔別玉容心萬緒。楚山不見巫山路。征衫寒峭尚天涯。竟怎任身無據。腸斷安排南北去。

卜算子

閒情

百種着人愁。只負春來去。作意爭春不解春。春在無情處。夢破却孤眠。畢竟天涯路。別是東君陵藉花。怕管窓前雨。

望江南

戲占

門晝掩。臨鏡問花枝。風若有情吹不去。月應無意照來遲。偏爲惹相思。

又

多少事。拋却一尊前。楊柳綠搖樓外雨。桃花紅點渡頭煙。有箇怨韶年。

又雜詠

江上柳。蘸水綠條條。乍送畫船穿樹出。旋看估舶繫繩牢。相伴夜還朝。

又

江上月。照水溜涓涓。逐影有人千萬箇。分輝不用一鈎添。休論缺和圓。

又

江上鴈。嘹唳碧天空。一陣驚寒欺客夢。幾行和淚托深衷。搔首各西東。

洛妃怨

憶往

會向那時深院。相見又還不見。欲待晚來風送行踪。風起浪花如雪。吹皺一江新月。莫恨水東流水無愁。

又江上

蕭索大江南岸。無奈風狂雲亂。回首舊長安。不堪看。京口夕陽一半。瓜步晚鐘聲斷。為客歲將殘。淚珠彈。

又偶感

楊柳綠。搖煙雨。一霎顛狂風絮。春已不勝愁。又春休。
早是東君無主。那更思量留住。留則怎生留意。悠
悠。

寂寞舊時池館。人共落花吹散。繫馬畫橋邊。恨綿綿。
心事倩誰堪管。忘却春風一半。沽酒醉還眠。夕陽

天。

搗練子

寫怨

雲影亂。月黃昏。一鴈南飛人斷魂。無奈角聲吹不散。

滿懷幽怨鎖重門。

又 客中

曉月白。曉霞紅。一片離愁客路中。還是歸帆吹不去。
背人無語祝西風。

又 閨意

悔別後。數歸期。腸斷無因更得知。獨有夜來樓畔月。
照人長是倚闌時。

又 代東

正相憶。乍相逢。一片柔情不語中。可是春風埋怨得。

為誰吹送隔簾櫳。

又

紅似錦。綠如絲。鎮日閒吟欲去遲。何許關情堪寄與。護花心性褪花時。

浣溪沙

有述

懶捉瓊梳倚鏡前。一番春病損眉尖。見時阿母不勝憐。多恐有心爭識得。嬌羞紅透雪腮邊。東風寒峭。彈香肩。

長相思

浦泛

浦南歸。浦東歸。一掉煙波遠自隨。無人攔住伊。望斜暉。背斜暉。轉過高樓楊柳堤。比他新畫眉。

又

春恨

柳依依。雨絲絲。濕盡堤邊新柳枝。花驄躍淺泥。馬遲遲。草萋萋。人在江南話別時。怨春春不知。

又

有感

掃蛾眉。畫蛾眉。弄粉窓前粧點遲。雙雙對對時。燕還飛。蝶還飛。一親去天涯人未歸。夢來夢更稀。

又 新秋

藕花紅。蓼花紅。轉過炎飈。秋雨中。一帆漁艇風。別
匆匆。恨匆匆。別恨年年千萬重。長亭盼不窮。

又 有感

望君恩。憶君恩。一番陳事曲中論。明妃何處村。暗
銷魂。正銷魂。學美琵琶拭淚痕。燈昏月又昏。

又 閏月

入羅幃。解羅衣。淒淒切切不堪悲。羸他月半規。照
人時。伴人時。一種深愁難訴伊。黃昏烏鵲飛。

又

鴈聲低。剪聲低。悄悄停針不語時。恨天恨與齊。月
還微。星還稀。星影參差月影移。照人有別離。

又 閏咏

望天涯。在天涯。望遠天長山又遮。寒林空暮鴉。鏡
臨花。鬢粧花。鏡裏看花花影斜。一番情緒賒。

又

角聲愁。鴈聲愁。愁對郎行古渡頭。參差紅蓼秋。憶
還休。恨還休。恨到天涯相憶不。黃昏何處樓。

又

風還清。月還明。風月偏當別後情。酒醒愁未醒。下
階行。遶階行。行盡疎鐘聞幾聲。是誰堪五更。

西江月 秋景

一望煙波凝碧。蘆花深處孤舟。有人醉臥伴沙鷗。占
得秋空時候。只是西風吹醒。醒來沒箇伊愁。漁歌
却又等閒休。山捲夕陽紅瘦。

又 送金潛五
返白門

桃葉渡頭夢去。水聲無恙秦淮。舊時王謝本多才。錦
繡心輕流輩。珠文枉得蒲帆東下。慚余蠟屐天涯。一番

驪唱繫人懷。寄着離愁共載。

又 栗斐章歸自高
苑雪中過飲

憶在去年正月。津亭話別匆匆。今宵來醉草堂中。滿
得半生如夢。水壺詩思濃於庭霰。酒杯疾似迴風。惟余
抱玉總途窮。不數添修五鳳。鸞

好事近 閨情

不道愁眼送春歸。只道一春如昨。綠葉枝頭遍了。又楊花
自落。初離香消翠減。奈何時悔。却當初。候着寂寞畫樓深
院。玉人渾似削。

又 寒夜

霜月耐愁眠。冷浸綠窗池閣。照高樓一帶繡。添香斜熏美人鬢。好事

如昨。歡情只問夜何。其夜長。今寂寞。心緒阿誰堪。

比看楊花飄泊。愁心道雪。

朝中措 脫泊

一江煙雨接天空。城郭有無中。短棹欲歸何處。到來

愁數征鴻。當年此地高樓無恙。樂事匆匆。借問岸

傍柳色。為誰憔悴春風。

鷓鴣天 無題

半捲珠簾出畫堂。對人情緒錯思量。偷將珠淚彈流

水。訴與東風吹向郎。春易老。日偏長。伴人湘枕卸

殘粧。一痕艸色侵階綠。無數狂蜂惱更狂。

如夢令 追憶舊遊晨星落落 偶疏姓氏輒成韻語

曾共旗亭酣宴。細雨杏花香濺。誰道別君時。一霎嚴

程如箭。不見不見。人比水天更遠。謂陳子長也子長隨相國出關卒於

外

又

曾共飄零輦下。隨例酒徒詩社。墨綬向蒼梧。委骨蠻

鄉瘴。楚休也。休也。有淚不禁重灑。謂俞智先也。智先令岑溪卒於官。

又

曾共秦淮河上黃卷青燈相向。老作蠹魚看。賸有壯心天樣。魔障魔障。摧抗斯人泉壤。謂顧葦石

又

曾共郡齋文酒。還到山園聚首。送爾破帆歸。屈指相逢秋後。否否。否否。顛倒玉樓人又。謂阮永叔也。永叔秋試別去墮樓而

七

又

曾共元龍為主。水閣啣杯忘暑。擊鉢妬詩成。瞪目吾曹幾許。何處何處。地下一聲杜宇。謂董文友

又

曾共探梅殘雪。媿我無端遠別。鵬蟻醉高齋。詩句贈人清絕。淒切。淒切。半世雄心灰滅。謂王疎文

南歌子

山居漫興

有意看雲宿。無心下釣遲。山中物色總相宜。道是天教清福没人知。愛竹頻開徑。巡花更插籬。聞來詩句覓新題。剝啄無聞。一枕日沉西。

虞美人

閨怨

一番春事匆匆也。閒着傷春者。東皇却怕惱人懷。斷送鶯時。花信不成來。蕉心舒卷愁難似。比亂絲誰理。東皇不怕惱人懷。只顧綠肥紅瘦向妝臺。

清平樂

詠愁

西來東去。粧就因風絮。處士高眠閒不與。只向蘭房深處。畫簾終日低垂。雙雙紫燕啣泥。記得別時相對。如今却又歸期。

霜天曉角

有贈

春風猜得吹向會相識。可正海棠花未一枝早。繡屏側。嬌酣無氣力。酒闌重記憶。題罷粉兒早非是真箇奈爭似。似撫人極。

減字木蘭花

戲東友人

畫橋東。去憶歡幾度尋芳處。莫道相逢蝶粉蜂黃似。夢中閒評丰韻。月映海棠紅。欲觀底事匆匆。往日漁郎隔萬重。

鵲橋仙

戲代友人

天長夢老。星沈月曉。鴛鴦譜糊塗位置。藍橋知否是。

裴航。枉道箇相思二字。對酒當歌。明眸善睐。一片
柔情獨自從。今收拾舊癡魂。鬼遮莫。更人前軒輊。

南鄉子 獨夜

又是酒醒時。舊夢迷離新夢遲。任意教人添炷起沉
疑。一片秋聲攪作詩。窗外月頻移。照得殘荷綠半
池。翻笑從來綠底事。尋思錯却而今待訴誰。

雨中花

同敦四放舟山園觀荷
安士不至作此奉東

咫尺林泉炎暑外。最荷芰晚涼堪愛。試斗酒十千。歡
言把臂。有扁舟共載。懊恨此身供襤褸。且何似翠

屏臥對。只帶水盈盈。高朋少一。欠事成吾輩。

少年遊

王阮亭先生
屬題小照

江南春在賞心時。攜取媚軍持。誰把生綃。幻成仙客
勝侶。屬花枝。雲亭問字較爲遲。李郭十年期。舊說
使君一琴一鶴。此外法曹詩。

中調

臨江仙

晚宿
山園

晚向干將山下住。居人寂似寒蟬。一灣澄碧舊林泉。
兩三漁艇泊。呼取試烹鮮。書亂到來能自帙。杯乾

欲覓難添。哀鴻飛度不禁憐。與誰論宿昔。憔悴是今年。

又寄景修

憶在上元燈下飲。醉餘豪氣依然。幾番慷慨是先鞭。向人無箇語。背地惜流年。一自津亭驪唱後。二三遊舊堪憐。寄將清夢鳳城邊。願君須早計。奪取錦袍鮮。

一剪梅

小園新移他梅為水損而作

春雨移添幾樹梅。未得花開。欲待花開。簇成香雪護

樓臺。詩也能來。酒也能來。那便林逋不借材。可快情懷。又惱情懷。亭亭瘦影逐波回。人也難諧。花也難諧。

感皇恩

郡邑大水淮揚已被放免冀幸率成

秋水共長天。波臣為虐。一望人煙投巨壑。香杭渴憶。欲待官逋如約。淮揚恩已。被趨城郭。吏虎而冠行。行且却。只恐屠門還大嚼。鄉隣相警。真是命。延鼎鑊。三空四盡矣。翔寥廓。

蝶戀花

寄吳靜山吳隱于市顧樂交遊家以是中落比其歸雪峯口占送之云黑貂裘

敝黃金盡半爲論交半賦詩卽吳可知
矣
向日攜朋會到處愛我新篇拉我壚頭駐倉卒主人
頻治具吟成苦被囊空遽
遠憶太湖西望路一片
離愁舊雨兼新雨載得浮名無意緒斜陽影裏人歸
去

又 偶憶

記得那時三五夜月影窓紗正是團圓乍鳳枕鸞衾
羞未嫁燈前慢把雲鬟卸一捻腰肢深慰藉別却
高唐辜負韶光瀉而今遠憶同杯斝等閒莫送花容

謝

兩同心 閨情

舊遊人也。邈若河山。閒眺處春蕪一片兜搭起。心在
眉尖。好天氣誰倩風箏化作青鸞。留取別緒千端。
莫助悲酸待相見從伊細數惡滋味強自爲歡無奈
是雙袖尋常珠淚闌干。

長調

賀新郎

索居無事回憶昨歲同秦方回王后張
季友洪屈遠姚赤城諸子於侍御施硯
山先生邸第留連文酒今俱各天慨焉
係之

淪落傷遲暮。記長安。懷鉛握槩。向蘭臺。聚藝事。敢誇
風格老無過。吾鄉舊雨。嘆擲地聲。諧韶濩。空谷斯人
憎命薄。待尋思。往事師心誤。遭按劍。能誰訴。花驄
行出頻相顧。願扶搖九萬。獎借欲生毛羽。爭奈秋之
爲氣也。嘹唳塞鴻南去。只艸艸別離。岐路倘憶舊時
賓。從在各天涯。縮地無由赴。題短札。封過與。

桂枝香

吾師吳非蒙先生喜
得孿孫寄調以賀

延陵家世。想千古高風。吾師其嗣。博物翩翩。爭奈敬
通見抵。一生空賦淮南桂。濕青衫。遍江州。淚談經虎

觀。宣麻鳳闕。文章甚地。竟何論。五經腹笥。看趨庭。
石隱孫枝。鵲起頭角。崢嶸管取他年高位。爲翁奪得
酬翁志。羨雙珠。盈盈川媚。菊蕊舒金。江楓吐燄。平輿
龍二。

滿庭芳

雪中過看嶺士
值外舅歸留飲

閣雨添寒。密雲飛絮。瑤林玉樹堪誇。扁舟乘興。還答
子猷家。可正霜臺迴駕。捉麈尾。鬢映霜華。團圞坐。左
圖右史。有酒恰如淮。尋常論。往事蠻爭。蝸角幾許
咨嗟。但名牽利鎖。情迫杯蛇。誰似歸田賦。早開三徑。

種竹栽花歌明哲。太和一室。隨意泛流霞。

沁園春 自嘲

南北東西。嘆此生碌碌。不憚輪蹄。便壯志難灰。青雲路杳。名場久困。白社空依。二十年來。秋風桃葉。一枕黃梁苦未知。更何事。海濱逐臭。按劍而歸。人言俗相非宜。縱傅粉塗朱。枉自癡。但半嶺梅花。千竿修竹。撇開破甑。收拾殘碁。箕踞科頭。水邊林下。夢斷春明。夢也遲。仲珪在。看骷髏畫就。誰喜誰悲。

木蘭花慢 庚戌除夕

記鳥飛兔走。纔屈指。驀攢眉。看冷煖世情。白衣蒼狗。慢不耐尋思。生憎筆花墨瀋。遇良辰。便欲賦新詩。四韻年年除夕。一衫歲歲如斯。狂奴近態。大堪嗤。難與俗人知。且恣意。頽唐十分放誕。逐甚高低。今宵得吾身暇。但杯鎗相送。黑甜時。遮莫嚇他腐鼠。儘教悟透醢鷄。

醉蓬萊 為陸蘭陔先生壽

問功名。嶺外鐵騎金戈。王師雲會。行省分猷。小夜郎無犬。一拂秋風。尊絲鱸鱠。便抽簪解帶。潘髻方華。陶

公作伴。急流其最。醉愛花陰。眠看山翠。遙想芳蹤。
蘇門巖瀨。刻燭詩成。答清音。天籟只可自怡。不堪持
贈。繞屋祥雲。蓋更看庭前鳳鳴丹穴。承歡未艾。

又 壽沈明生七十

笑儒冠閒却。遠羨沈翁山林。經濟七十年高。正朱顏
人瑞。信手拈來。頭頭是道。有金針玉匕。更問平生上
醫。鑿國一腔心事。鶯脰潮平。龍潭水漲。別我片帆
桃花塢裏。滿院木樨。引流霞微醉。萊舞堪娛。天公料
也。念神樓功次。袖把洪厓。胸襟瀟灑。太湖澄霽。

念奴嬌

贈武塘陳心微

別來何似。算天公草草。吾曹同貫。還記離亭叢桂後。
十二千支齊換。老怕名場。愁添詩句。世事成河漢。歡
言相對。依然爭美。柔翰。看取岸柳汀梅。奔馳底樣。
又早春光爛。一抹遠山青。我眼磊砢。半生冰炭。且任
為佳。試開懷抱。醉影春星亂。故人問訊。惠余新什。傳
翫。

水龍吟

春情

弄晴弄雨。春風畫簾寂寂。春情又。春遊何處。寸心千

里春光難皺。小市花聲。隔牆紅影。耐人拖逗。記年時
相對。年時相別。爭忍是。愁如舊。南浦掛帆而後。渺
盈盈。煙迷波奏。鬢絲禪榻。茶煙細颺。尋思多繆。覓得
驕驕。善和坊裏。崔崖。張祐算。而今只有故鄉明月。不
離懷袖。

滿江紅

東張
硯銘

三影先生。雄占着詞壇赤幟。美落華雲飛雨驟。江花
無二。處士星應太史奏。孝廉船學思光繫。手一編莊
子與離騷。終年歲。愁千萬篇章。寄看失馬同兒戲。

歎蛾眉謠詠。入宮自媚。和氏不將燕石售。當門早恨
生蘭蕙。讓周郎顧曲也。能無潛師避。

又 奉挽徐武
靜先生

高會堂前。沈醉着幾番花月。腸斷處。雄心無恙。漸催
華髮。北海樽壘如昨日。南州姓氏空傳說。聽行歌。蒿
里一聲收。人悲咽。青雲志。遭蹉跌。黃金盡。賓朋列。
想鄭莊豪舉。不堪獨絕。韋相傳經今有子。魏公遺笏
還承業。記向時。倒屣肯周旋。真叨竊。

又 看雪坡上人適主僧出諸公爲其徒
曉菴挽詩索句曉菴工於畫尤善奕

支許當年。有多少清談超越。畱下得。我曹佳話。賞心
禪悅。客座高僧。詩滿架。任山老宿。腸千結。嘆一瓢一
鉢。寄何人。殷勤說。塵世事。遽廬別。精進念。遭磨折。
記潑墨。煙雲前身摩詰。法到有爲。如夢幻。黃梅未老
先求脫。看棋枰無恙。挂堂頭。空推絕。

又 答宋 旣庭

屈指萍踪。虎丘上梅花僧舍。曾記得。籃輿相看。呼朋
連社。一望遠山青不斷。千章嫩綠。當新夏。有此時。舊
雨往來。頻傾三雅。不朽事。文章價。顏謝匹。曹劉亞。
奈功名蕉鹿。榮枯塞馬。君自蘭臺推匠手。我同麩尾
誰知者。乍經過。白苧白苧詩一招尋。中情寫。

又 送董蒼水 之粵西

綠暗紅稀。又艸艸旗亭話別。問此去。羊腸鳥道。霞蒸
雲疊。乍可臨邛誇令客。寧堪老作叅軍謁。笑世情閱
盡。竟如何。因人熱。詩警策。意疎豁。杯蟻泛。蟾光撮。
且停車駐策。宵殘燭跋。吳苑鶯啼。連驛店。蠻天猿嘯
來千峽。預期程。歸醉陸生裝。華筵列。

又 季友來自南浦。招集卽席。有贈歌妓湘煙次韻示之。

畫舸南來錦帆掛。桃花水漲。傾筐篋。言成珠玉。苦吟無恙。壯志只縈青瑣闥。柔情驀逗紅顏上。奈金釵二十。戲盤龍。誰會餉。春衫怯。秋波漾。黃河遠。憑低唱。問沈腰。潘鬢。愁酣於釀。人世那饒塵外趣。洗頭盆柱。何仙杖。儘百年。三萬六千場。無多狀。

又奉挽宋尚木先生

一疏潮陽。千載上風流如昨。人道是韓公今日。九原可作。到處碑題。詩句健。文山秀色。烘簾幙。問瓜期。却訝似。投荒長沉閣。燕市裏。傷漂泊。高軒過。還相索。記都亭出祖。廿年辜却。辛苦爲儒。叨注念絕。憐知己多零落。想靈旗。彷彿下崑岡。霑瑤爵。

又東季友

長日如年。只消得蟬聲盈耳。當此際。索居情緒。呼僮覓紙。試東朝川居士。處草堂况味。殊難擬。認夕陽。西下。是吾山殘紅裏。倚脩竹。吟方始。傾薄酒。狂初起。看漁舟兩兩。渡頭歸矣。滿把新篇。誰印可惠。余麗藻。空延跂。倘扁舟訪戴肯。重來覓然喜。

又有感

覆雨翻雲。可曾記日中爲約。回首處。乘車戴笠。盟言如昨。玉敦珠槃。休問者。人生富貴。須行樂。笑沐猴輕躁。竟何庸。從君作。遼東豕。遭輕薄。江東鱸。勞穿鑿。縱卞和屢別。懷珍自若。割席便應長訣也。彈冠却訝無斟酌。嘆古來。管鮑與雷陳。添蕭索。

水調歌頭

寓齋集曹掌公徐電發朱人遠葉元禮卓永瞻宋楚鴻王季友家雪客時電發將之錢唐雪客將還大梁

燕市說吳市。萬里故人同。免得餘杭清釀。呼取酒徒。雄袞袞。詞壇稱霸。多少生瑜生亮。救點筆花。工作惡。是離別。南北與西東。林逋宅。梁王苑。去匆匆。紅塵隊裏。車如流水。馬如龍。爭似一鞭歸也。檢校鷗盟鶴夢。添箇伴。漁翁無恙。舊山在。回首夕陽中。

柯齋選稿

雲間周綸鷹垂氏著

賦

寒夜賦

閉門寂寥杳無他人一寒至此玄夜獨吟慨遊子之
寡徒重羈旅而就淹何私心之不釋兮秋與冬其代
焉增歎歎兮志失愴畱滯兮逾年于時月窮于紀星
回于天密霰斯下凍雨旣零風入隙而自扇嗟褊父
之不全耿耿不寐中懷莫宣夫天運有常時序遞遷

處之者人心路萬千燃脂玩紙能無惻然若夫漢宮
悠邃複道緜長指長樂之溫室啓未央之椒房去迎
風之所辭露寒之傍設綠熊之席熏青木之香加玉
几以綈錦進象牙之火籠列具張筵奏曲無終粧繡
則藻龍連煌衣錦則雲鳳翻鴻調落霞之琴善翹袖
之容掛懸黎之磬撞碧玉之鐘果則霜桃雜前殺則
豹脯是供旣騁炎於火鵲復有命乎燭龍斯固至尊
之一事矣寧知暑寒之異同且夫華軒公子貂冕王
孫埒富烏氏驕譽平原齊稱金華之選厠足銅馬之
門家擅三組之榮俗上五侯之尊輕玄英而蔑權拜
黃羊之遺賜董偃捨含霜之室晶盤徹而不置方朔
入雲端之幕蛟縲冷而爲棄畱愛長宵展轉旣醉蕙
心度曲統質陳戲譬朝霞之停輝何舜華之比麗心
賞窮而逡巡伊柔情之善寄更有翠幔鴛鴦錦衾鸞
鳳不事宵征奚煩目送等修明之被教入椒華而珍
重覺永夜之獨短似陽臺兮無夢玉樊有比翼之鳥
上林舒同心之梅灼灼漢女依依鳳臺眉則翠羽不
分臉若芙蓉乍開嫣然一笑顧影徘徊粉殘露華朱

損慵來吹氣勝蘭寒谷春迴至若杖節去國乘駟出
關念彼交頸有桂南山穀不同室歿當無還生願玉
門胡然我艱朔風裂土肅肅入衣沙漠壅塞亭障晝
迷矧宵烽兮的的復候曉兮遲遲層冰凜凜兮寒無
已時愁燐明滅兮莫知爲誰哀笳一聲萬感係之酪
漿難與厭兮毳幙難與施野鬼夕號兮異代同悲擁
蔽褚而墜淚兮照孤影而自隨且如珠簾玉戶靡麗
增華掖庭無數克選黃沙美者自美埋形天涯夜悠
長兮不能寐雲山萬重兮歸路遐鞞鼓爭喧兮羶裘
是依幽憤蘊結兮無以室家喪身殊方兮托命琵琶
天冥冥而凝陰兮陽鳥迫兮西靡風急霰集漫漫千
里不知東西之與南北去與任其孰是且或征夫邈
邈遠路茫茫相見無期行役戰場暫綢繆於昔辰乃
離緒之惻傷怨春華兮易落比秋桂兮徒芳寒溫改
候歲月永望閨深夜靜猶餘薄粧簾下麟毫琴閒鳳
凰綃綺爲席懸黎爲床誰與處此玉筋成行街鼓遠
傳繁星流光乍對繡帷偏驚異鄉無解乎切肌之冷
莫祛乎透心之涼人生何幾掩泣彷徨寒夜則一別

于苑枯念我一身兮飄然我虞風蕭蕭兮悲音爲多
墨者處士爲寒夜之歌歌日夜長夜兮夜寒夜復夜
今歲殘寒復寒兮憂來之無端百年同盡兮誰知達
觀

送志賦 并序

余嘗讀江淹論隱書年已三十白髮雜生長夜輾
轉亂憂非一以余况之抑又甚焉淹三十前一爲
吳興令余馬齒則同而菰蘆長困回憶少時壯心
盛氣已邈焉不可追矣端居多暇玩其所著恨賦
有云敬通見抵齋志沒地輒爲之躊躇四顧淚雨
下不能止也嗟夫士誠有志恨亦宜然若夫在生
爲志溺志喪生詩人所由賦蟋蟀也舉而廣之聊
用自娛云爾故以送志命篇其辭曰

夫何大鈞之播物兮曠垓北而無垠孰予智而自夸
兮又重之以修能譬萍浮而蓬轉兮迺扼腕而臚情
或奮迅於高衢兮或躑躅而行吟爲奇葩而耀首兮
爲槁葉而夕傾或蘭芷而重筥兮或蕭艾而不馨固
賦物之弗齊兮何遨蒐而逡巡在統質而接歡兮在

橫波而目成願低帷與昵枕兮蹇誰愬兮將迎余處
幽篁兮終不見天夫人兮自有舜英埋愁積憾飲泣
吞聲至乃從容侍從熏灼門庭終童山東之選賈生
洛陽之珍舒向金玉淵海卿雲黼黻文明矢口廊廟
長揖公卿喬皇焉赫奕焉金張許史之盛程羅陶白
之盈世皆爲之匍匐而承教便辟而輸誠已矣乎貪
夫狗財烈士狗名有一於此咸喪我所守而惑我所
營我固知陸海之爲海兮神皋之稱神勢不能登巢
而琢蠶兮亦知夫節豈我名而潔豈我貞紛吾旣困

之五蓋兮固將袂之六塵隋侯之珠無以銜兮太顛
之貝無以矜何垂翅於迴谿兮又澗池之自程師公
綽之少欲兮悟佛氏之無生詎井渫之不食兮閨寂
莫而扞音庶害馬之已去兮姑愈病而析醒池魚籠
鳥不我思兮焦溪湯谷無用填膺染翰操紙慨當以
慷兮同萬盡於一科任大塊之流形鼈令浮尸兮烏
知治蜀牛哀化虎兮豈意逢兄人歿異物兮非有常
經心勺灤其莫釋兮夫蓋返之冥冥期玉醴之可酌
兮冀木禾之可耕鄙日及之朝榮兮哂鶻鳩之疾鳴

請迴小人腹一托君子心

世家

夢夢子世家

夢夢子、臥鄉人也、性柔媚、與人易親、不以氣陵物、無富貴貧賤、輒與之遊、游則畢世、不相輕絕、黃帝朝、風后力牧、才不登用、緣夢夢子始進、天下大治、帝謂夢夢子之得人、盡臥鄉之地而封之、曰、臥鄉君、策曰、維帝不德、倦于政、又不康厥衷、式求俊民、維爾用能、迪爾之明、弼朕不逮、厥舉賢艾、安朕師、朕嘉爾功、褒爾德、寵異爾爵、俾爾爲藩、輔臣、臥鄉勉爾丕績、世汝子孫、席乃寵於戲、畏天命之不可保也、欽哉、臥鄉君之爲國也、昧昧然、治萬物而不有好惡、一因乎人命、臣咸陟等、代理政事、居無何、課最稱職、帝愈益幸之、曰、以子大夫、臥治足矣、當黃帝之世、天下無夭殤、無愛憎、無利害、幾若華胥氏之國者、功預焉、善服食、導氣之事、從黃帝鑄鼎荆山之下、帝旣升天、而臥鄉君老猶畱人間云、堯時、與乘龍上太山、後有睡若者、增修厥德、恭天之命、擊紂之手上、帝眷臨、實憑依之、以錫

九國于西伯、世子發周之、尹氏大治產、有役夫老矣、筋力竭、而使之不得休、哀而問之、類賢者、薦之、上子之以國、越再傳、而復寢生著、稱楚子玉、爲瓊弁玉纓、河之神、屬夢于寢生、而欲之、曰、畀余、余賜之、孟諸之麋弗致也、而戰敗績、寢生不滅、詐詔上帝、剪諸鶉首、以予秦穆公、時帝醉醒而大索之、逐之大覺之域、而臥鄉、絕封、其枝屬、僅散處天下、夢非翁、魯人也、慨前世之遺澤、懷思先王、而慕孔子、行高、嘗與孔子、同謁周公於假寐時、孔子之徒、宰予、與其不肖之子、爲鄰、

誘宰予以匡、坐之、頃劫之枕簟之上、而欲奪其道德之緒餘也、孔子怒而絕之、宰予訴之、季氏遂滅夢氏、夢氏之庶子夢駮、逃而去之、後其孫夢栩、與莊周游學、其言其旨、荒唐不可據、有別族在巫山者、爲陽臺生、得不死藥、居于陽臺、能驅致鬼神仙人、桂父時遊南海、輒從之、楚襄王遊於高唐、命陽臺生而召神女焉、暖乎若雲、燠乎若星、名曰瑤姬、王悅、封陽臺生、寢丘地千戶、不受、後飛而上昇、漢武時、思念李夫人、冀陽臺生致之、漢武少恩、多殺方士、不樂就也、膠西董

相少得其方、作春秋繁露詞、相如將獻賦、未知所爲、
衣黃衣、下人間、謂之曰、可爲大人賦、其意多有裨于
操槩家、卒與呂仙交、而使盧生大貴、顯于唐開元中、
今邯鄲之人猶識其蹟云、

贊曰、始覺氏、夢氏、偏天下、今覺氏獨少、列子謂西極
之南隅、有國焉、晝夜無辨、其民不食不衣、而多眠、眠

五方知前是夢
則五旬所舉事、一以夢氏爲宗、覺氏則曰、妄人也、夢

夢子、豈其族歟、始以得人之故、割土封爵、卒後猶能
以天之貴盛、豐厚之資、予人、一同于宵征之人、胼胝
而竊之也、而子若孫如此、其久且遠、然則人事之久、
且遠于天地間者、亦學夢氏而已矣、

傳

旌節胡夫人傳

夫人姓胡氏、栢州青田鄉人也、父某、爲太學生、先世
傳儒者業、生夫人、幼而惠、父授之書、輒能誦、年未總
角、家之人以孝稱、迄里閭道說之、無有間、懷遠將軍
阮公諱謙、字益齋、長者也、世其官、第四品、守栢公之
先、五世祖諱福、以祖諱祥、官移守祥、濟南陽信縣人、

官元朝元帥鎮山東明洪武十三年帥其眾降改官

官之尋陟守燕山衛職職猶細微移任栝會栝有

隣寇亂蕩搖闔越間朝廷方危之公遂跋履山谷提

步卒若干人為他將應淡踐其地連戰賊多殲焉賊

卒朝廷偉其事躋前職者若干級傳至玄孫益齋公

生子二人曰承周長字希文居長嗣立為將軍曰承歡

字希舜俱產自夫人陳氏希舜生而陳夫人歿將軍

繼亡兄長兄希文字之成嘗曰弟有壯志冀得賢婦相

之使無以一切生產累也計之曰莫胡氏女也善其

家去此二百里許州之城人各傳其惠而孝事遂屬

媒告于胡約為婚姻許焉胡夫人年若干歸希舜公

春秋享祀必以敬助理中饋事諸所長希舜公益得

肆力為文以州學諸生砥行立名日陳篋數十書史

外無他好一時卓然有表見云生子曰國梁字吉甫

年六歲希舜公疾革屬于胡夫人俾教之卒年二十

八歲胡夫人年三十三歲哀叫怛恹泣不自勝凡希

舜公歿後事悉獨理之成禮晝則率侍婢績夜則抱

六歲孤以啼於旦吉甫公出就外傳母範甚嚴昧爽

而朝日入而夕歸於家每課其學吉甫公子以是早歲

擅詞藻譽自縣試童子科至府而督學使者三得第

一母為娶於麗水縣學諸生和嶷公家陳墀之女配之陳亦望

族也家以古道稱胡夫人屬於子之諸公行請于陳

年十七迎以歸奉養姑如奉慈母然日刺繡以粥直

進具而吉甫公亦得專事詩書冀仕進于升斗祿以

無貽母夫人憂未售而吉甫公死年二十一胡夫人狂痛欲

自裁捐世陳夫人哀毀中強為姑解曰請以死事姑

餘年且幸先人之嗣不絕也蓋吉甫公有子曰隆修

字永叔生一日僅識面焉胡夫人曰吾所以不即死

者兒且長我旦夕冀其有成我即死以報死者於地

下而使之慰未瞑之日也子且長今復天而處我安

能盡力是呱呱者以待他日之長他日之長而如其

父若祖志乎死即死耳命也爾誠有志吾以是付而

矣陳夫人泣諫固請得不果事其姑撫其嗣息苦辛

較姑同而對一息情痛倍焉養其姑年七十五歲卒

于順治十一年歲在甲午十二月某日陳夫人自年

十九歲守志教其子迄今若干年以文行為栢州士

首、巳亥、夏、麗水縣鄉人、會監察御史臨州、白其事於
令、令白其事於守、守白其事於監察御史、爲當世、維
風化、將厚錫予、以殊異之、生者、沒者、是在不朽、華亭
周綸、以家君守栝州、隨任、永叔、以文行、尤受知於家
君、得與交知、胡夫人、陳夫人之行、敬而書其事、并詳
其家系焉、

贊曰、余至栝、讀烈女張氏、若瓊傳、并其爲詩、悲其夫
沈生成年二十四、即不食、殞、所玩鸚鵡、暨其婢、俱悲
鳴、歿焉、并以葬于墓側、今松陽縣鸚鵡塚、是云、及見
阮氏婦姑事、又兩能矢志、扶持其先人、嗣弗絕、與若
瓊無所事事、喪身一旦者、孰爲多者耶、觀此、知歿易
立、孤誠難也、蓋自古嘆之矣、

柯齋選稿

雲間周綸鷹垂氏著

序

錢越江詩序

越江爲舍人寶汾姪舍人與余中表親者二一爲叔
姪一爲兄弟舍人長余一歲向時叙異姓齒稱伯仲
五六人志相符懽然猶昨日也舍人以宦去我輩老
諸生不宜數通顯者書所以自貴亦以貴舍人也舍
人今丙午秋例得試有司預京兆選固巋然先登士

大夫咄咄羨舍人才不容口越江與余交晚今升者
升沈者沈物以類聚固樂得而友也越江倜儻有經
術其爲人類滑稽者流然重然諾嘗急人之急視世
所謂馴謹無情實者其相去豈止什百耶發爲詩歌
又高華瞻逸酷似其叔五七言古今體俱規摹大家
爲古文辭嶽崎歷落相視真莫逆也客秦淮朝夕論
心並出撰述爲娛越江意中視余爲何如人哉我輩
才不世用長濩落風塵下得一知己無憾私心不自
揣量竊謂碌碌庸流如越江者真文字交也挾其詩

卷將北走燕趙我未知空羣之目有伯樂否其叔見
之許我爲知言否夫西子美矣不以適吳而始光艷
絕世也使必入宮見稱則天下大矣豈少一二好女
子哉然要爲我輩解嘲亦誰爲告之而誰爲聽之也
耶

冒青若詩序

今天下操觚之士無不知有如臯冒辟疆先生者穀
梁青若奉庭訓樂師友浸淫乎詩古文辭其於書無
不披覽與人言矜氣節十五年來江南北學士大夫

翩翩彥會輒屈指冒氏昆仲其著作日益富南金竹
箭無得而睥睨也先生家故華要壯歲棄其官其歌
臺舞榭流觴高會之所卽金谷豈是過乎無何產就
頽落向時先生扶危濟傾人緩急叩門者回憶不自
禁穀梁青若又依然儒素此承懽之倍難者也夫我
輩世其家學不克致身青雲有所表見豈等瓌瓌庸
流裁逞一技能便堂下拜舞堂上色笑者乎今丙午
秋試與青若晤語秦淮則予戰不勝者已四而青若
且三矣穀梁走薊門亦復不遇如尋常人青檀我故
物乎何戀之深守之不去也豈非天哉豈非天哉青
若之爲詩其大家風範直可自命一世世自有知之
賞之者又豈俟我輩二三故友爲之稱道始見哉在
八月青若屬余序友人陳其年病與青若爲周旋久
之未有應也今且焚筆研絕意斯事矣魚書之便因
作此報之

栗斐章詩序

觀海栗斐章其先世以明初軍功世祿觀海本俞氏
從上行在問姓上食粟未有對也遂賜姓栗故子孫

不敢易也二十年來革故鼎新世家望族十不存一
滄海桑田遑問一官無恙乎斐章以故家於越遊於
吳其腹笥雖老師宿儒爭避席生徒日衆交遊益廣
來我郡之東臯者一再至東臯薄海岸而居其潮汐
消長雲日摩盪發我徒之達觀等塵世於浮漚其間
每多偉人不齷齪作尋常行事余中表親爲伯叔行
者若天石金先生我郡之詩人世居東臯者也與其
地王氏玠右名世今之所謂江左高氏王先生者並
與之交往往稱道其詩不置我友錢氏越江與斐章

爲東臯詩會余聞其才久昨歲家大夫揖其爲人讀
其爲詩歸而命余曰浙觀海栗氏斐章者其文行而
可友也今丙午延之家使容兒宋兒執經先生暇不
廢吟咏凡爲懷人思土登臨感物之什悽惋其境也
正復韶令如二八年時一往俊逸駿駿乎作者之堂
而入之室也夫詩窮而後工使我輩日艷心通顯胸
中柴棘蓋不知幾何矣天石越江見其所新著愈益
歎賞豈他山之在余哉今凡序人詩文務極推許及
至展卷欲卒則不饜觀聽譬玉樹青葱雖美勿實也

我故詳其所得之自而諷詠之者其以我爲信人也
哉

石樓刪稿序

山榛隰苓西方美人之思沉芷澧蘭南國大夫之怨
軒轅旣仙龍髯斯杳燕丹爲質馬角無歸悵玉樹於
後庭失金蓮之故步長楊獵騎不奉發矇之言武昌
釣臺寧慕慙色之主至于鴻都待制杭爵橫流虎門
近臣階榮頽徑總幃不施對銅臺而心惻竹宮于此
共玉杯以神傷屈平宋玉辭賦繼稱蘇武李陵離別

珍重遂使悠悠六合無濟蒼生擾擾百寮莫披丹府
若夫羊祜出身以來歷膺顯任庾亮求食而已終等
凡庸無不星流電逝分路揚鑣或則二嶠虎口多邁
災屯九折羊腸無逾蘊結開金庭之幽館曾何預夫
淪亡秘玉笈之玄文聊足娛平時序切松煑朮亦以
求生刻骨伐毛豈其自保青牛關下良以悼夫伯陽
朱鳥牖中末由窺於王母乃有竄命身毒辭骨月而
曷還服教辯才去埃氛其若浼玉毫可接金粟是依
非必幻緣賢功名之志解茲塵網獲遐曠之途佛爪

五色匪爲太建之年真理一人已失嘉賓之賞魂魄
不愧慕義亡窮天地爲爐銷愁何極暨于北海昔年
徒有浮雲之句西州中夜宛其華屋之哀歿生大矣
感慨係之睹林師之拱木愴爾如何經黃公之酒壚
愀然已矣夷毀銷譽畧無世情收迹寡徒唯有待老
加以聲繁柁鼓響急胡笳秋爲氣也不殊楚人之悲
月出皎兮無異陳風之感晝數鴈羣夕視燐火蕭蕭
者觸目之景搖搖者中心之私塞下帛書莫慰深閨
之婦窓中錦字難憑遠道之人醉花鳥于客館豈是

忘憂指雲樹於鄉關總爲勞積霏霏雨雪疲馬驅而
不前碌碌風塵壯顏萃而靡返益皆悲從情至恨向
別生坐琉璃之帳顧影徘徊下火齊之床凝眸佇立
夢中識路非無雲雨之期覺後獨栖便是瓊瑰之贈
隔簾翠羽對而驚心滿徑朱英因以悵結故可緣托
湛淡擬方搖落關雎肇風人之義鳴鹿開雅詩之端
如得其情一言以蔽僕行負不羈幼好奇服雕龍有
志集螢無成伏處菰蘆之中不逢諸葛非徒竹箭之
美未遇孔融想雲戶而安栖嘆人生之到此掃門而

仕視等吹簫彈鋏以通幾於掄袂折克宗之角操康
成之矛何足怪乎必有以也而人號戴憑誰堪奪席
家餘班史無可質錢寧得謂嬰兒之傷不加怨而見
德侏儒之嘲將去辱而就榮玉衣金環何心下地牧
雞圈豕暫足資生張克稱吳國男子弘景曰巖下鄙
人挹鹿門之遺風弔羊裘之高致然蔗杖難扶菊水
易竭徒患相如瘠渴之病輒咏孟德伏櫪之詩未足
投筆終當燒硯顧以遜頓榴花之酒莫解鍾愁扶桑
桐葉之箋差能屬意論其舒憤寧止韓娥之曼聲究
以興文猶是盛覽之問賦合之歷年存爲三卷譬猶
夏蟲鳴時順其物候遂似魯魚成字有待覈裁公習
徃跡此則俱刪刺謬昔賢庶幾垂教

李首愚小品序

攷之鯉魚徑尺非無捨去之思鷓鴣一身亦有摧殘
之感穗乎不獲歌零落於齊臣葛以作絲道苦辛於
越女去天三百或阻攀援掘地一雙難通姓氏金膏
翠羽委蛇咳唾之前和璧隨珠銷落詆訶之下斯皆
供人感悼覩彼躊躇者也首愚李氏產自東甌聞於

南國小時了了邈矣終童晚歲便便巋然魯殿繁花
開樹張華側理之箋嬌身啼春陶令閒情之賦謂宜
承明早厭相要車笠之盟豈其曲逆長貧不異龍蛇
之怨間因好事輒著新篇本號多才還憐敝帚固已
名高日下品重雲間孫綽之賦擲金聲張融之文成
玉海未足均茲美麗譬此芳蕤乃系出龍門傳爲模
楷鏡添鶴髮無用歡娛聊假日以登樓遂呼朋而命
駕吹臺近市丘遲得應曲之材孤嶼橫江謝客有懷
新之作言從千嶂來步九峯無恙故人歡然握手幾

年別則慰甚加餐僕潦倒風塵遲回泥滓菰蘆伏處
身將隱矣焉文蒲柳向衰悲哉秋之爲氣李氏盡繙
蠹帙頓發芸編目炫七襄似入錦官之肆神清五宅
如來雲母之丹別示外篇寧同玉碎集成小品總類
珠聯暇則揮麈而談居然理勝驟或據梧以聽正自
情移何止叔度當前人消鄙吝嗣宗在座語輒遙深
而已哉譬之南威西子自愛新粧碧玉綠珠真成薄
命庶令遺朱剩粉猶艷稱於天涯際景餘暉尙偷照
於人世云爾

宋旣庭詩序

廣平先生菟苑棟梁人倫模楷才雄八斗陳王覩而
不平學富五車梁相知而且却風雲腕下逸思橫生
綺繡毫端名篇迭見早已江東獨步仲翔爲竹箭增
華冀北空羣道真非葫蘆敢請玳筵時啓倒屣諸公
縹帙嘗隨傾筐餘子固宜鵝池振羽虎觀揚鑣出入
承明之門雍容珥筆之選何乃一丘甘隱遂初之志
能堅五岳牽情濟勝之裝輒辦昨遊三竺茲及五茸
唳鶴灘頭肯來畫舫思鱸巷口頻接清談吊平原之

故墟挹季鷹之高致斯人千載吾友一時僕本不文
未窺半豹君嘗逾分謬飾真龍願老菰蘆霄漢無乘
槎之路耻齊槐柳交遊違戴笠之盟獨有宋公不遺
周子屢逢贈縞無替班荆時暮春以遙臨閣仲夏而
徑去萍踪蕭寺妙諦曹谿間集墻東宛同河朔盼繁
紅之着樹好鳥啼晴覽嫩綠之當軒名倡度曲載看
擊鉢競羨探珠用是列爲一編可銷炎暑玩之雙手
孰假萱蘇洋洋大國之風千人自廢灑灑小山之作
七步彌工昔揚雲匠心每賚鉛槧馬遷史業迺誌登

柯齋選稿 卷之二十三 九
臨是知風雅一途不律有江山之助抽揚數過斯文
將日月爲昭出祖贈言猥叨屬序停車握管不盡懸
旌

柯齋選稿

雲間周綸鷹垂氏著

書

寄陳其年書

日月不居江河長逝離羣索處亂我心曲詩人三秋
之感良有以也况壯歲云徂盛顏難再而塗朱傅粉
巧學市門多見其蕉萃矣每承梁伯鸞之風家元道
商山之椽未嘗不心焉慕之然世情驅人拙於自解
脫炎熱所加不寒而粟足下何獨無情乎以足下之

才尚猶如此僕又何言哉又何言哉足下振筆妙天下
晤言之頃文不停綴雖復羽觴隨波笙歌間奏名
倡稠坐雜賓盈前爛若春榮思若湧泉莫不循玩反
覆愉目蕩心竊謂擇交以來固青雲之一鶴矣足下
豈諛言是急僕又豈素工佞者耶要是雙眼在耳悠
悠道路人之相知貴相知心僕方冀築室十畝之間
桑柘陰陰雜卉當階貯醇醴具其脆偕弟承顏聊用
娛樂有子侄提弄膝下方謂長委農野差得天賜若
染翰伸紙亦復結習未祛六塵如故如何不爲之疚
重尺素不宣

寄冒青若書

心哉足下與令弟無恙天倫之樂諒有同心出入珍
往與足下定交白門足下年二十僕二十一不謂傾
蓋以來僕便已三十足下且咄咄逼人未知此後歲
月更當何如故復詳其衷曲幸惠施之有托也僕性
不習貴游而人間結納以此爲重間或車馬雜逐賓
朋盈座僕以不相深知之人隨俗俛仰低肩躡足強
爲酬對爲之恣然汗出諺曰難可狎李鱗甲是之謂

乎又常情晤語好相推高若名公鉅卿正自不因人
熱而季緒瓌瓌好詆訶文章比至要津止爭道競進
務飾諛辭呂氏淮南方之闕如也僕願從事而聾在
舌不能發請爲諸君鼓隴胡退耳少時好馳射旬日
便取道三四千里耳後生風鼻端出火謂少壯寧復
計老大時人中有布馬中赤兔輒思擬人必以其倫
也豈意終日伏几學劍不成還學書乎僕更重患面
交同志相規有見亟陳平時作文每伸紙疾書輒恠
授簡者之不敏捷也性病躁故交游間大抵如此足
下真知僕者其亦何以策之得黃金一笥不如爲伯
騫所識僕與足下可無冀望此也人不婚宦情欲失
半僕遊方外以待足下矣惠示詩粲然珠玉夫聽白
雪之音觀綠水之節而下與東野巴人校美惡乎辱
教以序足下之篇章書還不知所云

記

拾遺犀者記

余在處州侍家君署中知有拾遺犀者以告曰小人
行澤得是以俟王者請歸諸官異之識其姓名而去

命境內外有王者以聞越五月有自閩來者狀符命
守藏吏出以予之謝曰小人唯是暑雨祁寒之不保
憂凍餒之不時至逐羸計餘以餬其口于四方水爭
長風陸披霜雪物畏虎豹人備盜賊候曉鷄鳴司關
上稅歲之所息十未得其一而先已失其四三道此
樂土沐浴盛化小人願以半予告者曰爾以半予之
以報我民我之民以不拾遺爲義爾以庚我民之德
以爲我謝不若全我民之義以彰我之能致其民之
義爲獲不亦多乎彊予之叩頭而去事畢旌其門表

示一鄉焉旣而監察御史代狩臨州故事有獎善人
者太守以是舉召其人不知所之嗟乎高隱者流歟
余嘗歷大國經都會地求聞有若人者幾乎處州爲
東越窮荒入萬山中如坐井底土瘠而貧纍石以環
土不淡三尺而耕遇大水則石上之土漂而無有旱
則機器無所用之界連婺州多揭竿者時以千數居
民雖太平世苦之嗟乎夫猶有若人者風厲之邪彼
士之志潔行廉束身砥行而名磨滅於虛無人之鄉
者又可勝道哉家君之守是土也迄今逾二載矣先

是至任不五日代狩者臨州民之訟而屬太守治者
七百餘以十日理之逞其狡詐者折之訟以是衰息
會海氛亂以所得俸爲寮屬倡募工造舟百以備內
江衝截不兩月成民了不知有舉事鑿懸崖從衡五
百餘里率先寮屬出俸錢募工迄六月成昔之豺虎
克斥草木叢蔽者行者便之有前渠魁賄降而復肆
毒者出于上官請而正之餘黨屏迹悉慰諭之歸而
田廬無有弗寧而居嘗曰求貨以盜而出之復求盜
以法而死之等盜也將何以南面爲凡兩造之受理
而去者厥明率拜頌于公門以爲不可居而禁止也
然終弗絕茲若人也謂非有所施而致此歟爲作拾
遺犀者記姓胡名溪篙師也御史臨之前日蓋爲人
操舟去云

四月芙蓉記

章安金氏兄弟玉音玉藻其讀書地有芙蓉盛開於
巳亥夏四月其鄉之操槩家各從之飲酒其下爲詩
遺之永寧李首愚續爲之賦詩且以屬余增美其事
告余曰余鄉之王先生某章安之何先生某兩人舉

進士高第有名于時若有爲之兆與金氏兄弟事符
余按郭璞曰江東人呼荷華爲芙蓉近世江東人專
呼蓮花爲荷華木芙蓉爲芙蓉校蓮花後開會稽有
百葉種鐘陵有同心種宜盛於仲秋夫秋之爲氣蕭
瑟而此花獨嫣然宋玉東家子非更能遠過也然余
竊恠之以彼其情何于此遂不可自釋或曰唯唯否
否君子得其時則駕不得其時則以宋之材屬哀怨
之深比芙蓉之乍秋而發也余按董仲舒曰四月陽
雖用事而體不獨存故謂之陰月又曰水極陰而有
溫泉水至陽而有涼焰四月芙蓉異乎不異乎或又
曰董曰四月陰氣始生于天上芙蓉之開預其氣之
候豈不然歟余起而爲之祝曰其二子之學銳身于
成功有如此其二子之學信于兩先生之應科目有
如此又爲之祝曰其二子之學毋必異以爲規毋欲
速以爲戒有如此李子曰善遂以記

古銅印記

己亥秋八月永嘉李首愚出古銅印一示余曰余昔
治圃土深二三尺家僮掘而私之不知爲何也水拭

之磨去其泥附質堅好所著亦不可卽盡予目而翫
之畱之三閱歲其篆痕乃稍見之迫求之試加濯焉
則臣李賢卽四字也是姓若名與予同故寶之屬予
爲記嗟乎物之得所于歸者乎向使圃之地不治不
知其幾千百年終泯沒朽裂于穢污之間所著之泥
卽盡又不知其漸益銷剝也亦唯質堅好不隨衆糜
爛幽有鬼神當知加珍重愛惜善時以歸于吾子亦
唯子之姓氏相契合而不以蚨珠彈鴉棠谿之劍獲
穗也吾以故多所慨矣按卽四傍刊花文當是宋元
遺物


遊南明山記

出梧州城南百步有大溪溪清見底一望亂山青翠
環衣袖間山光倒映水中可掬也渡而南求所謂南
明洞天者山相錯不可辨曲抗行一里許有一茅屋
奉佛脫帽而前大呼稱快者李子首愚臨風而立指
點高岫者阮子永叔隨而至者舍第十經過茅屋數

步山勢如欲崩壓如新篁競秀如長松屈盤如牛眠
如蛇驚如冠冕整齊寺有僧慈鑑前而上有亭亭
而望九月始獲人如奕棋如貫珠面對石梁由石
梁傍行石壁二丈許中開通人行跡爲石門有堂
俯瞰所謂石梁者如虹臥傍虛下空由堂而進有
佛堂堂內有井日葛井爲葛洪遺跡由堂而上二
十步餘有巨石中空爲洞如合掌因名合掌洞余
曾夏月遊此猶寒由洞而上爲最高亭亭下爲丘
爲壑爲田爲屋廬括州城人煙可數亭後有山無
行路余攜壺于石梁前之堂疾飲大觴醉騎馬歸
括城天已暮余將返憶夏月與同鄉顧東籬及永
叔遊此值燕山董心水縱談今顧在吳董在永嘉
同此唯永叔耳後之遊者知周子歸乎不可無以
記

虎丘遊記

極天下名山不勝算而虎丘嘖嘖在人口虎丘遊
之日亦不勝算而中秋觴咏絲竹之盛著山之
高不里許其周遭僅倍之無深窅寂寞之致足
動騷人逸士感慨流連者焉侈其勝日劍池水
一泓可鑑形影兩



原件短缺

P8后缺

壁峭拔榆柳蠹峙差可人意而緇流滄鄙往往斂寒
暄強過從每思好吟咏爲之閣筆者數矣池之前巨
石廣袤足千人聚坐天下人耳目之所習咸知有千
人石以其近城市無道里之賒登陟之困故闖闖之
子日相狎不憚勞秬余辛亥歲八月十五夜一小舟
泊山之南岸垂楊下徐步焉畫舸四會有及山之門
止者有未及山之門止者有離山之門一二里止者
杯竿狼籍朋伍踟躕其艤舟也舟相軋不能前卒求
其舍舟而陸一入山之門瀏覽所謂劍池諸勝者什

柯齋選稿

雲間周綸鷹垂氏著

說

螳聚硯說

莊周曰羊日不慕螳螳慕羊日羊日羶也使外其物
滅其性遊乎空虛之域羊日亦惡能致乎螳哉彼螳
謂羊日之知已也宜石之爲物族于山貌剛而質堅
其朗潤類玉者鑿其天無安其所錫之踰糜俾正厥
職終日矻矻唯主人之使而功無預諸有自壘空來

者大若小羣向之而趨行列秩如無須臾間副墨子
見而叱之不去乃割詹何之粒餉而遺之重之以文
曰天道恢恢造化無形耳目口鼻于人鍾英汝將何
肖蠢焉不靈不汝丘垤而硯席是營我將遷子遠去
生芒芒昧昧莫揣其情主人乃爽然自責曰
子攜斯石遠託異鄉是唯子依子來曷常子不是保
證以爲防唯卑濕地唯炎瘴方證也不穀實唯繁昌
于石是依彼視猶陵阜而孰知汝俯叱之無益以文
何攘聽汝環聚莫之汝妨于時屏氣遷延如有所失
退而復集久于爾室拂几几黑與石若一味何在墨
墨何汝賦以琉璃爲宮而汝忘東西之與南北嗚呼
噫嘻物有所不絕人有所不通又何尤焉又何尤焉
彼證謂茲硯之知已也亦宜

攜間字說

人之生也是有物予之以生人之生而歸於無何有
也是有物奪之以去其予者我不得而論也今夫生
而有喜怒哀樂是喜怒哀樂所極爲歌爲泣爲趾高
氣揚爲掀髯抵几爲吞聲匿影情之所鍾自號於世

日我目能視耳能聽手足便利我心至靈其不同於
蠢然而物者無盡量噫嘻亦甚矣夫不觀之物乎木
森然而秀而中有戕敗之者是木之有蠹也當其爲
蠹也羣聚侶處剝蝕其中以果其腹是蠹亦物中至
靈者也我身知木之靈不藉蠹以見我身知蠹之時
木之爲木且痛苦之疾惡之也哉人生而有喜怒哀
樂是人之蠹也而天下攘攘方謂我心至靈我能喜
怒哀樂凡逆我心者我捨之唯恐浼適我心者我趨
之唯恐後凡所以運我心而用我心之靈者矻矻不
休宵晷迭乘而奪之者至矣是機巧之爲患烈也此
其心曾不得旦夕少暇焉是可悲也觀海友人栗氏
年四十易其字爲拙閒有旨哉我故樂得而爲之說
至拙之爲拙閒之爲閒此栗氏四十後當自辨之我
不能爲人謀也

祭文

祭誥封徵仕郎王公文

維年月日謹以清酌庶羞之奠致祭于誥封徵仕郎
王公之靈嗚呼哀哉夫仁焉而終智焉而斃昔人所

悲高風長逝惟公之生資德能粹韋弦殊施圭璋一
致迺孝迺友迺慈迺惠道方和平鄉名君子馳情丘
索鉤淡玄史酒賦無歇琴歌時理解體世紛鯉庭勤
誨學無所遺千人皆廢春華匪績秋實是佩翰動爲
章紙落散采金聲玉振寥亮區內經國大業遐不干
載軒圓麟祥丹山鳳瑞按轡天衢度越等輩謂澄清
志謂廊廟宰含一之德上台其待錄文都邑百川赴
海羣英幸甚俊賢斯在備官行人東西是使載持龍
節南國之紀假道江流陟岵陟屺公于是時琴瑟燕

喜受祿以養資父優仕去親還闕依依桑梓公于是
時國恩賀至遷爵夏官機密攸寄霸上棘門詎令兒
戲授才繡衣王畿飭視鄴侯之功轉漕用誌如坻如
京廩人不匱帝勲日嘉晉秩稱事拜命陳情乞歸辭
位公于是時萊衣扶倚人懷盈尺家有千里公之諸
孫蘭傳玉似顧慚後生婚姻孔邇綢繆觴酌追隨杖
履疇昔之歡疑寤疑寐公之令德金石難救公之享
年七十有二夫豈不祿人靡所庇景行之思誰不隕
涕散財振窮族戚以次臨訣若吉尚猶如此雙樹拂

衣金沙脫屣公之不朽光于塗議曰惠曰康或存梗
概公之潛隱靖節宜謚亦有殺嘉亦有酒旨敢不薦
馨公庶鑒是無聞公言吁嗟徂矣嗚呼哀哉尚饗

祭誥封王太夫人胡文

維年月日謹以香茗敬祭誥封王太夫人胡之靈嗚

東昂辨香清酌康嘉送都憲是神尚書君諱奮若夫元配太夫人尚西言

呼哀哉猗歟胡公陶正肇宗釋兵妹耀德授經臨邛邈

矣奕葉跂彼芳蹤懸冠戢羽名著華容夏陽晚學不

懋邊功陽陵平反顯秩征東清畏人知濟美安豐山

賓夙惠學士東宮緬邈右族閎閱彌崇玉水方流璇

源圓抗繫太夫人煌煌曩轍毓德高門伉儷明哲秦

晉衿施纈郤禱結締綌恒勤蘋蘩以潔迺相夫子侔

徽靖節光茲洪裔劭夫史列瑯琊子中象微彰徹伸

卿抗直彈劾炎熱扶平就國高風不滅夫子伊何後

先輝映鹿裘自溫芝糧優競望彼遯棲巖石玩志吟詠

龍奮藻煌霞在性履道常坦秉尚允正南州推徐谷

日微鄭既稱月旦亦日水鏡爰有偕隱必戒必敬心

厭世紛砥節礪行皓首終諧積善餘慶於休華宗天

降俊英誕惟甫申王國之楨翰墨為績早歲飛聲半

豹未若、凌雲是程、驥擅郵眷、璞耀南荆、六月暫息、三

年長鳴、濟濟紳珮、升里閩名冠如越一腋乃驚、全煮清榭枳梓、棟幹帝庭、矯

若驚龍、出入承明、台衡峻階、允屬輿情、全煮清撓匪因濁、澄

匪加清、山公以度、石友心傾、車本皆兵攬轡乘驄、威行逖邇、魏

室裾牽、軒庭軼指、封鮪無庸、詰不報、教贈增紫奉檄有似、績簡帝心、蒼

生久倚、大正外邦表請抽簪、旋反桑梓、緱鶴俄升、哀哀陟屺、禮

稱顏丁、號泣在耳、惟我汪君元配胡緊太夫人、摩竭掩室、酌原淶池、希

曜慧日、婉嫕淑慎、恭儉靜一、看鳳翔霄、含飴繞膝、名

溢縹囊、卷盈緇帙、蔚彼春華、豐盈同夫秋實、寶昂我我母師、鄉

閭獎帥、夫何厭世、長桑解出、女士準儀、彼岸若失、其

在密親、能無淚溢、顧慚後生、叨蒙莫述、寶昂迺焚甲、寶昂剪迺

滌醑、清奴惟恍惟惚、涕淚雨泗踟躕、援筆陳辭、吁已矣、夫潔

餐馨膳、受養桑榆、音蘭沙云逝、母儀猶存珠塵則無、素旗飄揚、楚

招室、靈闕其庶鑒茲、少盡水漿藉用區區、嗚呼哀哉、尚饗

公祭徐武靜先生文

維年月日謹以庶羞清酌之奠祭于武靜徐先生之

靈日嗟嗟先生而竟嗇于天耶抑為善者之不必蒙

福而食德者之在其後耶將秋之為氣蘭摧蕙槁所

謂茁其芽者之有所俟耶嗚呼哀哉我爲讀東漢史
策歎黨事起禍至烈陳仲弓以名德爲世所宗張常
侍以之多所全活夫士君子不能奮身青雲澤被天
下而顧以華閥重名處世故震蕩時卽人不指摘其
心能一日安乎此非大具堅忍類難自脫然者况能
濟人於厄如仲弓多所全活豈數數見耶我以嘆先
生之遇險若夷數十年來以其身奔走天下豪傑羔
雁雜前嘯歌不廢卒能使伯兄闇公先生海外孤忠
無以極危可駭之跡覆巢而敗之卵也先生之命意

良厚先生之立心殊苦先生著述斐亶卓然名家壯
時與伯氏仲氏樹幟菟苑顧累試不售會鼎革先生
念家難不旋踵應制府辟叅謀蓮幕幸際 國恩許

伯氏生還而闇公先生已不食死先生是時如手提
千鈞而釋之一旦也撫先生猶子如已子與安士賓
士自爲師友並以文行擅稱識者謂先生大器惜卒
無先爲之容能讀賜書而克紹相君纓笏者將在是
乎將在是乎安士以詩古文雄視流輩久困場屋已
酉秋入太學應京兆試其制舉業並嘖嘖不容口復

見擯於主司先生以書命之日而負笈在外學無所成爾無我歸也先生性不耐心計之事所嗜以友朋爲寢食家用益落嘗急人之急即公家所儲不暇料也又乾沒吏增益稅額中其言於令先生以故發憤疾亟復以書命安士必得當於令若吏以慰下泉未慰之靈無徒用扶服苦塊爲也今先生啣怨者旣掛吏議身且遭不測安士歸率令弟賓士將營先生葬事凡四方知名之士聞治先生喪無不素車白馬至者先生大名幾滿宇內先生有子能昌大于後先生之靈可以無憾獨是某等向時杖履追隨文酒畱連今洗爵欲荐而渺不可復也已矣先生而竟齏於天耶其然耶其不然耶里社之所楷模者又奚氏耶我黨之奉爲矩矱者將安歸耶嗚呼哀哉尚饗

爲家大人率綸祭張蓼匪先生文

維年月日謹以香帛牲醴致祭於予告陝西叅藩撫治西寧張公之靈日猗歟右族實首清河人文烏奕弁冕勾吳綿綿奕葉衣紫鳴珂維君家尊曠代鴻儒胷函二西賦擅三都早歲射策簪花玉除冠蕊珠榜

入承明廬儲材黃閣講幄是需溘焉藏器學士焚魚
魏公遺笏宰相遺書維君濟美懷瑾握瑜經術管葛
詞藻應徐淵源克紹爲衆楷模庭列羔雁門鞅顧厨
振筆成采吐言如珠俯視流輩亦步亦趨往余締交
白首如初賢書同荐杏苑踟躕維君前席載颺訃謨
拜官水部出掌舳艫淮海維揚晝錦川途出納飲冰
帝咨日俞漕輓攸寄兼最 天庾持衡玉尺罔泣鹽
車伯樂一過其在茲乎分藩河右萬里馳驅長城之
倚歎塞懽呼建牙晉陟控制西隅疇謂弗勝菟裘是

圖盡瘁執掌乞身里居勗諸令嗣彈指天衢昂昂千
里玉立星羅維君不棄婚媾惠余出入肩隨斗酒與
俱春花秋月並命籃輿自壯及耄石友叩湏胡天不
弔哲人云徂悲風哽咽停雲欷歔爰陳牲醴聊用區
區靈兮髣髴涕泗滂沱嗚呼哀哉尚饗

祭張使君夫人文

維年月日戊辰朔誥封恭人張夫子夫人之訃聞於
松凡松之人向之沐浴惠政歌思太守張公不置者
知太守張公夫人不諱賈男賈女殆猶之痛心疾首

於慈母宜也况深得我師之教牖掖獎借輒蒙說項
斯者又何如哉又何如哉用是門下弟子某偕弟某
以届先大夫祥忌遲之二十一日戊子謹奉生芻束
帛侑之庶饁清酤爲文而赴祭於靈以哭之嗚呼夫
人高門自出體脩貞淑嫻詩禮與師族望相匹也潔
蘋蘩飭組紉勿以一切家事累俾得覃精墳史振藻
藝林蔚爲世大儒掇魏科起家肇蒞秣陵大郡循卓
聲不脛而走江南北屈指龔黃治行表帥庶寮時我
松之父老晷夜跣足以望車蓋來久矣洎臨松爲政

愈益繕剔師熟習松之凋弊去害馬而躋之衆於春
臺松是以霍然有起色尤亟念松人士向舄奕文苑
比年以賦重役繁幾瀕於翳桑之餓夫無復家和璧
而戶靈蛇矣我師興起文教時鼓舞而休養之用能
奉模楷爭自刮磨踴躍於我師之所爲訓松之諸生
中得拔擢致身青雲者踵相接顧余跼伏名場垂十
五六年老困菰蘆會不足惠齒牙而我師試之多士
輒冠一軍暨弟某並辱異等視則我師之作人深仁
厚澤拊膺媿憾者也我師比當應尚書期將不次大

展布其才以霖雨天下魚軒翟茀後福且無量趨庭
之餘絳帷北堂所克紹箕裘翱翔霄漢者更僕數乃
瑤池之召遂一旦棄人間世去耶長公以敏練見推
樞曹次公爲名刺史今垂天之翼且遲以六月息耶
抑他年上殿問隔屏風坐故事其舍清河氏也耶其
亦何足歔歔隕涕而爲夫人致戚於三壺間也耶其
鑿茲耶否耶嗚呼哀哉尚饗

不得一二噫虎丘之大槩也余已而命酌酌有頃偕
第十經踏月千人石上或浮白呼盧相與昏醉於瓊
瑤世界一片石又半爲鋪吸人攫去且餅師無數負
擔輒喚人誇寒具不可耐云

